

Nekī Kā Peḍ

Taurait : Yashaayaah 61

Allaah rabbul azeem ne apnī taaqat mujh me phuñkī hai.
Allaah taa'alā ne mujhe chunā hai
ki maiñ pareshaan logoñ ko acchī khabar sunaañ.
Usne mujhe tuṭe dil waaloñ ko shifā dene ke liye bhejā hai,
aur un logoñ ko āzaad karne ke liye ki jo qaid haiñ,
aur un logoñ ko jo andhere se ghire hue haiñ. ⁽¹⁾

Mujhe ye ailaan karne bhejā gayā hai
ki Allaah taa'alā kī khaas meharbaanī kā waqt ā gayā hai,
aur us din ke baare me bataane ke liye ki jab bure logoñ ko sazā milegī.
Taaki jo log gam se bhare hue haiñ unheñ ye sun kar sukun mil sake. ⁽²⁾

Mere watan kī zameen par jo bhī takleef me hogā,
maiñ unke saroñ se raakh haṭā kar taaj pahanaaungā.
Unke gam le kar khushī atā karuñgā,
maayusī kī jagah ummeed kī chaadar atā karuñgā.
Tab wo log nekī kā ek baḍā peḍ kahalaaenge,
jisko Allaah rabbul azeem ne apnī azmat ke liye ugaayā ho. ⁽³⁾

Wo log kāi pushtoñ pahale tabaah ho chuke,
shaharoñ ko phir se ābaad kareñge.
Wo khañḍar ho chuke shaharoñ ko phir se basā leñge. ⁽⁴⁾

Anjaan log aenge aur tumhaarī bhedoñ ko charaayā kareñge.
Dusre mulk ke logoñ ke bacche tumhaare kisaan hoñge
aur tumhaare baagoñ kī dekhbhaal kareñge. ⁽⁵⁾

Tumko Allaah taa'alā kā imaam kahā jaaegā,
log kaheñge ki tum hī Allaah taa'alā ke khidmatgaar bande ho.
Tumhaare paas saarī duniyā ke khazaane hoñge.
Tumhaare dushman bhī tumhaarī izzat kareñge. ⁽⁶⁾

Tum ko beizzati ke bajaare tumhaare haq kā do gunā diyā jaaegā.
Tumhaare log badnaamī se bach jaaenge aur usī me khush raheñge jitnā unke paas hai.
Unko apnī zameenoñ me dugnā hissā milegā,
aur unkī khushhaalī hameshā qaayam rahegī. ⁽⁷⁾

Kyunki Allaah taa'alā kahtā hai, "Maiñ tumhaarā rab huñ, jisko inṣaaf pasand hai."
Maiñ tuṭ-paṭ aur har galat kaam se nafrat kartā huñ.
Maiñ inṣaaf karuñgā aur logoñ ko wahī duñgā jiske wo haqdaar haiñ.
Maiñ unke saath kabhī nā khatm hone waalā ek ahad karuñgā. ⁽⁸⁾

Aur unkī aulaadeñ dusre khaandaanoñ me mashahur hoñgī,
aur unse paidā hone waalī nasleñ sab logoñ me.
Jo bhī unheñ dekhegā wo unheñ pahachaan legā
kyunki ye wo log hoñge ki jinko Allaah taa'alā ne barkat se nawaazā hogā. ⁽⁹⁾

Maiñ apne rab se bahut khush huñ!
Merā dil Allaah rabbul azeem kī hamd-o-sanā kartā hai,
kyunki usne mujhe nijaat ke kapḍe atā kie haiñ,
aur mujhe nekī ke libaas me lapeṭ diyā hai.
Maiñ is tarah se sajā huñ ki jis tarah ek dulhā apnī shaadī ke liye taiyaar huā ho;
maiñ ek dulhan kī tarah zewroñ se sajā huā huñ. ⁽¹⁰⁾

Jis tarah se zameen pedoñ ko ugne me madad kartī hai,
aur ek baag beejoñ se kopleñ phuṭne me;
isī tarah se, Allaah rabbul azeem nekī ko qaayam karegā,

aur apnī taareef duniyā ke har ꝑhaandaan aur qaum ke saamne karawaayegā. ⁽¹¹⁾